

[TRANSLATION.]

KAUNIHERA MAORI : HUINGA TOPU.

I RUNGA i nga whakaatu i tukua i raro o te ringa o taana Nuinga o te Kawana, ka huihui nga mangai o nga Kaunihara Maori i te ruuma Maori, Whare Paremata, i te 2.30 o nga haora, i te Turei, te 29 o nga ra o Akuhata, 1911.

Ko nga tangata i reira ko te Honore A. T. Ngata, Minita o nga Kaunihara Maori; ko J. B. Hackworth, Hupiritene; me Ihaia Hutana (Tamatea), Perehitini; Henare Werahiko, Te Arawa Kaunihara Maori; Heremia te Wake, Hokianga Kaunihara Maori; Paratene Ngata, Horouta Kaunihara Maori; Whakangaro Makahue, Kahungunu Kaunihara Maori; Taraua Marumaru, Kurahaupo Kaunihara Maori; Moerua Natanahira, Maniapoto Kaunihara Maori; Ratima Aperahama, Mangonui Kaunihara Maori; Pouwhare te Roau, Matatua Kaunihara Maori; Kingi Ruarangi, Ngatiwhatua Kaunihara Maori; Rawiri te Ruru, Pewhairangi Kaunihara Maori; Rere Neketini, Raukawa Kaunihara Maori; Taiawhio te Tau, Rongokako Kaunihara Maori; Hamiora Hei, Takitimu Kaunihara Maori; Ropiha Rangihaukore, Taranaki Kaunihara Maori; Kepa te Ahuru, Tongariro Kaunihara Maori; Waaka te Huia, Wairoa Kaunihara Maori; Te Weri Haeretuterangi, Whanganui Kaunihara Maori; Tahua Watson, Arapawa Kaunihara Maori; Wiremu Taniora Parete, Maahunui Kaunihara Maori; Tame Parata, M.P., Araiteuru Kaunihara Maori.

Panuitia ana i reira nga whakaatu mo te ra me te wa e hui ai ratou, me te whakaingoatanga o Ihaia Hutana hei Tumuaki.

Ka whai kupu karanga, mihi, a te Honore A. T. Ngata ki nga mangai, me te whakatakoto i etahi take hei whiriwhiringa atu, me te whakamarama ake ano i nga mahi a nga Kaunihara.

Ka whakautuutua ake e te Tumuaki me etahi o nga mangai.

Te Hekeretari.—I runga i te motini a Whakangaro Makahue (Kahungunu), whakaturia ano ko H. Hei (Takitimu) hei Hekeretari.

I runga i nga whakamarama a H. Hei kei te ahua mate ano a ia, whakaaetia ana me whai hoa-mahi a ia.

Meneti.—Panuitia ana nga Meneti o tera o nga hui-topu, whakamanaia ana.

Whakamaramatia ana e te Tumuaki nga whakahaere i raro i era o nga kupu tohutohu.

I runga i te motini a Rere Neketini (Raukawa), ka kiia: Ka tuaruatia e tenei Runanga nga take i kitea i tera o nga huinga o nga mangai a, e tino mea ake ana e me tino whakamana rawa ano nga kupu tohutohu kahore ano nei i penatia.

Haora Huinga.—I runga i te motini a Rere Neketini (Raukawa), whakaritea ana koia nei nga haora hei huinga; Turei, 29 o Akuhata, te 2.30 ki te 4.45, a te 7 ki te 9; na, mo etahi o nga rangi te 10 ki te 12.45, te 2.30 ki te 4.45, te 7 ki te 9.

Pukapuka tauira mahi.—Whakaaroarohia ana tenei a whakaritea iho ko te mea tuatahi me tono ki a te Honore A. T. Ngata kia homai e ia he whakarapopototanga o tetahi Ture whakatoputanga (i nga Ture Kaunihara Maori), apiti iho ki taana whai-korero i te whakapuaetanga o te Runanga nei.

I runga i te motini a T. Parata (Araiteuru), whakaritea iho ko nga mangai anake me nga mema Paremata e tuku mai ki roto ki te Runanga.

Ka hiki te Runanga i te 5 o nga haora.

Ka tu ano te Runanga i te 7 o nga haora, tae katoa ake nga mangai.

Tae ake ana a te Honore A. T. Ngata whakamaramatia ana e ia e na te poto rawa o te wa i kore ai e oti wawe nga mea i tonoa ra ki a ia mo ana whai-korero, aha atu hoki. Mea ake ana a ia e ko te mahi tuatahi ma te Runanga he whakatakoto putake whakaatu i te tika o te whakaaro kia tu tonu ano nga Kaunihara i raro i nga Ture Kaunihara Maori.

Komiti-raro.—I te motini a Rere Neketini (Raukawa), whakaritea iho e ko te kupu tuturu a tenei Runanga me mau tonu te mana o te Ture Kaunihara Maori, 1900, me ona whakatikatikanga, apiti iho ki nga Kaunihara kua whakaturia nei, a, me whakatu he Komiti-raro hei whakaatu i nga tika o taua kupu tuturu nei i nga mangai nei na, ara: Te Tumuaki, H. Hei, Paratene Ngata, Taraua Marumaru, me Waaka te Huia.

Komiti Marae.—Whiriwhiria iho te mahi ma te Kaunihara ina kore tetahi o nga Komiti Marae e whakahaere i taana mana mo te takahanga o tetahi o nga pae-ro, a, i runga i te motini a Hamiora Hei (Takitimu), kiia ana me hoake nga patai nei na kia whakautua mai e te Tumuaki Roia o te Karauna, ara:—

Mehemea ka whakawhiwhia e tetahi Kaunihara Maori ki tetahi Komiti Marae, ana mana i raro i tekiona 5 o te Ture Whakatikatika Ture Kaunihara Maori, 1903, tena ranei e ahei taua Kaunihara ki te whakatu whakawa takahanga pae-ro i taua marae, mehemea ka kore taua Komiti Marae e whakahaere atu i taua take? (Tuarua) E kaha ana ranei tetahi tangata, i waho ake o tetahi mema Komiti Marae, ki te tuku putake takahanga pae-ro ki te Kaunihara Maori, mo tetahi o nga marae e kore nei e whakahaerea taua takahanga e te Komiti o te marae?

Ka hiki te Runanga i te 9 o nga haora.

WENEREI, 30 O AKUHATA, 1911.

Ka tu ano te Runanga i te 10 o nga haora, tae katoa ake nga mangai.

Whakautu a te Roia Karauna.—Ko te whakautu tenei na mo te taha ki tekiona 5 o te Ture Whakatikatika Ture Kaunihara Maori, 1903, panuitia ana:—

Ki taku whakaaro ki te tupono, i raro i tekiona rima o te Ture Kaunihara Maori, 1903, kua tukua e tetahi Kaunihara Maori ona mana ki tetahi Komiti Marae, hei reira e kore ia e ahei ki te whiriwhiri ki te whakawa ranei ina takahia tetahi o nga paero i tukua atu ra e ia tona mana i raro i aua paero ki te Komiti Marae. Ka ahei te Kaunihara ki te whakawa ki te uiui ina takahia nga paero, a ka ahei ia ki te whakatau whaina hei utu mo taua takahanga, a ranei, ka ahei ia ki te tuku i aua mana ona ki te Komiti Marae, engari kaore te Kaunihara raua ko te Komiti e ahei ki te whakahaere tahi i aua mana i te wa kotahi. Kaore te Ture i